


BENO PELISA NSEMO

 Mbote mingi. Yayi kele . . . [Mpangi mosi ya bakala me tuba, “Yayi kele microphone ya nge.”—Mu.] Yayi kele microphone ya ntete? Matondo na nge, tata. [“Yayi kele microphone ya mbote.”] Yinga, tata. Mbote mingi. Mu me mona ti ndinga ke na kuvutuka na manima kuna, mpe na yawu . . . Mbote, bankundi. Beno lenda kuwa munu mbote mingi kuna na manima? [Dibuundu me tuba, “Yinga.”] Yina me sukisa yawu. Matondo na beno.

² Kieleka mu kele muntu ya bweso, na suka yayi, na kwiza awa na estrade yayi, na manima ya bimbangi yayi me pesama; samu na kumeka na—na kutula kaka mwa mingi na yina bawu me tuba, samu na kunata balusakumunu na beto mutindu beto me sepela na suka yayi. Ntangu yayi, mu me tala ndambu ya yawu vwandaka kieleka . . .

³ [Systeme ya PA ke na kuvutula ndinga. Mpangi-bakala mosi me tuba, “Mu banza ti beto ke tula yawu, yayi, na kati-kati, Mpangi Branham.”—Mu.] Mbote mingi, tata. Ya kele mbote mingi?

⁴ Ndambu ya bantu yina me baka ndinga awa, mutindu bawu zonzaka, mpe mingi na kati ya bawu . . . Mbote, muntu nyonso na zulu awa vwandaka na kimbangi ya kieleka, ya nene. Mutindu mu ke sepelaka na yawu, kimbangi yina ya mbote samu na Mfumu!

Ntangu yayi beto ke belama na Ndinga.

⁵ Mpe munu, sabala yayi, mu me baka lukanu na kati ya ntima ya munu ve samu na kukeba bantu bangunga zole to tatu, ya kuvwanda, samu na kuwa munu. Mu ke tuba na beno samu na yinki mu—mu ke salaka yawu, bankundi. Mu me longukaka ve, mpe mu lenda tuba kaka na nzila ya lutwadusu ya kimpeve. Ntangu yayi, muntu yina kele na ndongosolo, ntangu yandi kele ya kutwadisama na kimpeve, mpe; kasi yandi lenda tendula yina yandi ke na kutuba, na nzila ya malongi ya yandi, kubasisa bandinga yina ke nata bantu kuzaba yina yandi ke na kutuba. Kukondwa ndongosolo, mu fwana baka bidimbu ya yinza mpe kulakisa na nzila ya lutwadusu ya kimpeve yina kele na munu. Mpe yina ke salaka yawu mpasi mingi, bantangu yankaka, samu na bantu na kubakula ya kieleka. Beto ke mona ti mu vwandaka kieleka na kidi-kidi samu na yawu tii mu monaka na Biblia ti Nzambi salaka mutindu mosi, na banzila mosi.

⁶ Beto ke tala, mutindu Jean Baptiste, ntangu beto kele ve na kimbangi mosi ya ndongosolo ya yandi, mpe kuna, ntangu yandi—ntangu yandi basikaka na ntoto ya kuyuma, yandi bandaka na kuzonza na . . . dibuundu ya yandi, dibuundu ya

kilumbu yina. Mpe beto ke tala wapi mutindu yandi tubaka yawu. Yandi tubaka, “Beno dikanda ya banioka.” Beno me mona, ya kele yina yandi vwandaka sadila, yinza mpe ntoto ya kuyuma; bampova yankaka, kima yina ya kuniongumuka mpe ya kuviluka, mpe yina ke na kuvuna. Ntangu yayi, muntu yankaka kuzwaka bampova yankaka yina yandi zolaka sadila “bantu ya luvunu” to mpova yina yandi zolaka zonzila yawu. Kasi Jean sadilaka mpova “nyoka.” Mu banza ti muntu nyonso vwanda bakula yina yandi vwanda zonza.

⁷ Na yawu kuna yandi tubaka, “Beno banda ve na kubanza na kutuba na beno mosi, ti, ‘beto kele ya *yayi* mpe beto kele ya *yina*,’ samu ti mu ke tuba na beno, Nzambi kele na kiyeka ya matadi yayi awa,” beno me mona, beno me mona, ve kima mosi ya nene. “Nzambi kele na kiyeka na matadi yayi.” Yandi tubaka yawu na yinza.

⁸ Mpe, diaka, “Ba me tula disoka na nsimbulu ya yinti.” Mpangi-bakala mosi ya mbote ya kulongoka, na lutwadusu mosi yina ya kimpeve, lendaka tuba, “Yandi ke kufwa kimakulu.” Yandi tubaka, “Disoka kele na nsimbulu ya yinti.” Yina ke kufwa yawu kimakulu, na mutindu nionso, beno me mona, na yina yandi—yandi zabaka ti ya vwandaka mutindu yina. Yandi vwandaka kaka na banzonzolo yina, samu ntangu yankaka yandi me longukaka ata fioti ve.

Beto kulumusa bayintu ya beto na mwa ntangu fioti.

⁹ Mu kele na balombilu awa samu na kisambu. Na yina, ya kele kikalu ya munu, kusambila samu na bambevo. Mu kele na mwa balombilu awa, mwa balombilu ya mfunu mingi. Mpe mu zaba ti ya kele na mingi na kati awa. Mpe kana ya kele na bayina na suka yayi, yina ke zola ti ba bambukila yandi moyo? Mbote, kana beno zola kaka kutelemisa maboko ya beno na Nzambi, kutuba, “Mu . . .” Ntangu yayi beno simba kaka balombilu ya beno na yina beto ke sambila.

¹⁰ Tata ya beto ya Mazulu, beto me belama ntangu yayi na Busantu ya Nge, na Nkumbu ya Mwana ya Nge ya Santu, Mfumu Yesu, samu na kulomba kima yayi, ya konso muntu yina me sonika balombilu ya bawu, yina mu me simba awa na diboko ya munu. Mingi-mingi mwana-kento ya mpangi-bakala yayi ya ntwenia, ya kitoko yina me lwala ngolo mingi na kisumbula yina. Mu ke sambila samu na mwana yina, Mfumu. Mpe mu ke sambila samu na balombilu nyonso yankaka. Mpe bayina kele kieleka ya kinsweki samu na beto ntangu yayi, kaka na bayina me telemisa diboko ya bawu; kasi Nge kele Nzambi ya seko, mpe Nge zaba konso mitifi mpe balombilu ya beto nyonso. Beto ke sambila ti Nge ke pesa mvutu. Samu Nge silaka yawu, beto ke kwikila yawu.

¹¹ Mpe beto ke lomba ntangu yayi ti Nge ke baka mwa bampova yayi yina beto ke tanga, mpe ke twadisa yawu na beto na

kimpeve, Mfumu, na yina beto ke vingila na Nge. Ti Mpeve-Santu kubelama na mosi na mosi, mpe kumonisa na beto ntendulu ya Ndinga. Samu beto ke lomba yawu na Nkumbu ya Yesu. Amen.

¹² [Mpangi mosi ya bakala me tuba, “Mpangi Branham, beto lenda meka mpe kumona kana ya ke na kusala?”—Mu.] Yinga, tata, mpangi-bakala, sala yawu. Ya kele mbote mingi. Na yina mu ke na kusosa ntangu yayi, mu kele na . . .

¹³ Mu vwanda bambuka moyo na Masonuku ya munu mpe nyonso, kukondwa kuzwa noti mosi, kasi kubanda ntangu mu me luta bamvula makumi zole na tanu, yina ke tambula mbote mingi ve. Mu fwana bambuka moyo na yawu na kusonikaka yawu. Ntangu yayi beto ke . . .

¹⁴ Ya kele mbote mingi? Beno lenda kuwa yawu mbote? Ve. Na manima, ba ke na kungisaka bayintu ya bawu. Ya lendaka vwanda . . . [Mpangi mosi ya bakala me tuba, “Nge fwana telama kaka na ntuala ya yawu.”—Mu.] Nge fwana kutelama . . . [“Kaka na ntuala.”] Kieleka. Mpe wapi mutindu yayi ke vwanda mutindu *yayi*, beno lenda kuwa yawu? Wapi mutindu samu na *yina*, ya ke vwanda mbote mingi? Mbote. Ya kele mbote.

¹⁵ Ntangu yayi mu zola benda bukebi ya beno na—na Esaie 42:1-7, mpe diaka na Matthieu 4:15-16.

Beno tala kisadi ya munu, yina mu ke simbidila; musoolami ya munu, na yandi moyo ya munu ke sepela; mu me tula mpeve ya munu na zulu ya yandi: yandi ke basisa lufundusu na Bantu ya makanda.

Yandi ke boka ve, to ke telama ve, to ke nata ve ndinga ya yandi kuwakana na bala-bala.

Yandi ke buka ve madiadia yina me bukana, . . . yandi ke kufwa ve nsinga ya mwinda yina ke na kupela diaka: yandi ke nata lufundusu samu na kieleka.

Yandi ke kondwa ve to ke vwanda ya kulemba ve, tii kuna yandi ke tula lufundusu na zulu ya ntoto: mpe bisanga ke tula kivuvu na musiku ya yandi.

Mutindu me tuba . . . MFUMU, yandi yina vangaka mazulu, mpe tandaka yawu; yandi yina panzaka ntoto, mpe yina me basika na yawu; yandi yina pesaka dimpa na bantu na zulu ya yawu, mpe mpeve na bayina ke tambulaka na zulu ya yawu.

Munu MFUMU me bokila nge na ludedomo, mpe ke simba diboko ya nge, . . . ke keba nge, mpe ke pesa nge ngwisani ya bantu, samu nsemo ya Bantu ya makanda;

Samu na kuzibula . . . meso ya kufwa, samu na kubasisa . . . bantu ya boloko na baboloko, mpe bayina wandaka na mpimpa na ngaanda ya . . . yinzo ya boloko.

¹⁶ Mpe ntangu yayi na Santu Matthieu 4, kubanda na nzila ya 12, beto ke tanga yayi.

Ntangu Yesu kuwaka ti ba tulaka Jean na boloko, yandi kwendaka na Galilée;

. . . bikaka Nazareth, yandi kwisaka mpe zingaka na Capernaïm, yina kele na simu ya mubu, ya bandilu ya Zabulon mpe ya Nephthali:

Samu ti ya ke salama yina zonzaka Esaïe profete, na kutubaka,

Yinsi ya Zabulon, mpe yinsi ya Nephthali, pene-pene ya kizunga ya mubu, na simu ya Jourdain, Galilée ya Bantu ya makanda;

Bantu yina vwandaka na mpimpa monaka nsemo ya nene; mpe na bayina ti vwandaka na bizunga mpe na bivudi ya nsemo ya lufwa me telama.

Kubanda ntangu yina Yesu bandaka na kulonga, . . . kutuba, Beno balula ntima: samu ti kimfumu ya mazulu me kuma pene-pene.

¹⁷ Mfumu sakumuna Ndinga ya Yandi! Ntangu yayi dilongi ya munu na suka yayi kele: *Beno Pelisa Nsemo*. Mpe kaka na nswalu nyonso mutindu mu lenda, samu ti beno basika samu na lukutakanu yayi yina ke landa ntangu yayi, yina ke vwanda pene ya baminuti makumi yiya na tanu.

¹⁸ Beno zaba, Tata Mc Anally, mu banza ti yandi kele awa. Mu monaka tomabilu ya yandi na nganda. Mwa ntangu fioti me luta, beto vwandaka ya kuvwanda, mosi ya banzietelo ya munu ya ntete awa na Arizona, samu na kuzomba. Beto vwandaka ya kuvwanda awa pene-pene ya Mongo ya Superstition. mu me kuwaka yawu kubanda ntama, mpe mu me kuwaka masolo mingi yina ba me tubaka samu na Lukwikilu ya luvunu. Mu ke bambuka moyo na kotalaka yawu, mbala ya ntete; ya vwandaka na ntwala ya kilumbu, mpe kivudi ya nene ya mpeve yina vwandaka ya kunamika na esete ya munu, yina vwandaka ya kuzabana mutindu Lukwikilu ya luvunu. Mu me kuwaka ba-Indien, mutindu ba vwandaka zola ve kubelama na yawu, mutindu ba vwandaka na boma, mutindu ba vwanda niokula bantu ya Espagne na bilumbu ya ntete ntangu bawu vwandaka sosa wolo. Bawu tubaka ti bampeve ya yimbi yina vwandaka zinga na kati ya yawu. Nionso yayi zangulaka bukebi ya munu. Kasi mu vwandaka kaka na mwinda ya posi, samu na kumona Lukwikilu ya luvunu, ntete.

¹⁹ Mpe kuna mu vwandaka tala mbote tii, na manima ya mwa ntangu fyoti, ngolo ya mwini bandaka na kutambula na zulu ya mpimpa. Mpe ntangu ya salaka mutindu yina, ya kabulaka mpimpa na nsemo, mpe pusaka mpimpa na manima. Na nsuka, yandi vumbukaka na mazulu ya yandi, kuna na zulu ya mongo,

mpe ya vwandaka lakisa kaka yina ya vwandaka Lukwikilu ya luvunu. Ya semisaka yawu mpe talisaka yina ya vwandaka. Mpe kubanga nionso mpe boma nionso mu vwandaka na yawu samu na Lukwikilu ya luvunu, ntangu mwini vwandaka sema na ngolo ya yandi na zulu ya yawu, yawu nionso kwendaka.

²⁰ Mwini kele ntinu ya bansemo nyonso na zulu ya ntoto yayi, na bansemo ya yinza. Ata ti wapi mutindu nsemo ya bantu yina beto lendaka kuzwa, mpe wapi mutindu minzenzi ya nene beto lendaka basisa; ntangu mwini yina ke basika, nyonso yankaka ke zimbana.

²¹ Ya kele kima mutindu mosi ya kele na Ndinga ya Nzambi. Ntangu Ndinga ya Nzambi ke telama, balukwikilu nyonso ya luvunu, bufanatiki ya denomination mpe nyonso, ke mwangana, mpe ya ke lakisa kaka kieleka yina ya kele. Nzambi, na mbandukulu, tubaka, “Ti nsemo kuvwanda.” Nsemo ke kwizaka kaka, Nsemo ya kieleka, ntinu Nsemo, ke kwizaka na nzila ya Ndinga ya Nzambi. Nzambi kabulaka nsemo na mpimpa, na mbandukulu. Mpe Ndinga ya Nzambi, me monisama, ke kabulaka ntangu nionso Nsemo na mpimpa.

²² Bantu lenda telama na *yayi, yina*, to *yankaka*; ba-isme lenda basika, Communisme, Fascisme, mpe ba-isme nyonso yankaka lenda basika; balukwikilu ya luvunu, balusambu, nyonso yina ya lendaka vwanda, lendaka telama. Kasi ntangu Nsemo yango ya Biblia ke telama, balukwikilu nyonso ya luvunu mpe nyonso . . . Kasi, beno me mona, beto zaba ti ya kele kuna, kasi tii Yawu ke siamisama, ke talisa Nsemo ya Yawu; na yina beto kele ve na muswa ya kuswana samu na Yawu, samu ti Yawu ke kanga nsemo nyonso yankaka. Yesu tubaka, “Ti konso ndinga ya muntu kuvwanda luvunu, mpe ya Munu kuvwanda kieleka.” Ndinga ya Yandi kele ya kulutila zulu na bandinga ya muntu nyonso, na zulu ya nyonso, nyonso. Ndinga ya Yandi kele Nsemo.

²³ Mpe beto zaba ti na mbandukulu ya fwana vwanda na lubungi mpe mudidi, mutindu yinza vwandaka baluka, mpe ntangu Nzambi zabaka ti Yandi vwandaka na nsatu ya nsemo. Ntangu yayi, nkuna ya Yandi vwandaka yimeni na ntoto, samu ti Yandi kunaka yawu kuna. Ntangu yayi Yandi vwandaka na nsatu ya nsemo samu na kubasisa nkuna yina, samu na kusala ti nkuna kuzinga, samu nkuna vwandaka yimeni kuna.

²⁴ Kaka mutindu ya kele na konso nsungi, Nzambi zabisaka beto na ntwala yina ke salama na konso nsungi. Kima mosi kaka Yandi kele na nsatu kele kumonisama ya Nsemo ya Nzambi na zulu ya Masonuku yina, samu na kusala yawu kuzinga samu na nsungi yina. Kaka . . . ? . . . Mpe ya ke sala yawu ntangu nyonso yina Nsemo lenda kuma na Ndinga. Kana Ndinga me mena, Ya ke sala ti yawu kuzinga kana ya kele nsilulu samu na kilumbu yina.

25 Beno lenda kukuna blé na ntangu mosi, to mbuma na ntangu yankaka. Bimenina yankaka ke basikaka malembe kulutila yankaka, samu ya ke landila nsungi.

26 Ndinga ya Nzambi ke kwizaka na nsungi, musiku mpe lemvo, mpe nyonso yankaka yina, na yina beto me lutila na bansungi. Mpe, konso ntangu, ya me pela na kumonisama ya Nsemo ke mwangisa Luzingu yina kele na kati ya Nkuna.

27 Na nzila ya Ndinga ya Nzambi, mwini ke sema bubu yayi, samu mwini yina beto ke sepela kele Ndinga ya Nzambi yina me monisama pwelele. Nsemo yayi ya mwini yina beto ke mona na nganda kele kima mosi ve kasi Ndinga ya Nzambi, ntangu Yandi tubaka, “Bika nsemo kuvwanda.”

28 Mpe yinki kana Yandi tubaka, “Ti nsemo kuvwanda,” mpe nsemo vwandaka ve? Na yina ya vwandaka ve Nzambi zonzaka. Ntangu Nzambi tubaka, “Ti ya vwanda,” ya ke vwanda. Mpe na yina beto ke mona ti mwini yina beto ke sepela ntangu yayi kele kumonisama ya Ndinga ya Nzambi yina tubamaka na Genèse.

29 Mpe beto ke bakula ti Nsemo ya Nzambi ya kilumbu kele Mwana ya Yandi. Yandi vwandaka m-w-i-n-i [s-u-n—Mu.]. M-w-a-n-a [S-o-n—Mu.] kele Biblia. Yandi vwandaka . . . “Na mbandukulu vwandaka Ndinga, Ndinga vwandaka na Nzambi, mpe Ndinga vwandaka Nzambi.” Hebreux 13:8, “Yandi kele mutindu mosi mazono, bubu yayi, mpe kukonda nsuka.” Ya kele Ndinga ya Nzambi, ntangu nyonso. Ya vwandaka Klisto na kati ya Noé. Ya vwandaka Klisto na kati ya Moise. Ya vwandaka Klisto na kati ya David yina talaka na zulu, mutindu ntinu yina ba losaka, na zulu ya mbanza; kisika, bamvula bankama nana na manima, Klisto vwandaka kuna vwandaka dila na zulu ya mbanza mosi, na kuvwandaka Ntinu yina ba losaka, kaka mutindu David vwandaka. Ya kele ntangu nyonso Mpeve ya Klisto. Mpe kumonisama ya muvimba ya Ndinga ya Nzambi kuzabanaka na nzila ya Yesu Klisto, Mpeve ya Nzambi.

30 Luzingu mosi ve lenda basika na ngaanda ya nsemo. Nsemo ke basisaka; nsemo ke basisaka luzingu. Ya lenda vwanda ve na luzingu—luzingu na ngaanda ya nsemo, ya yinza to ya kimpeve. Ya fwana vwanda.

31 Mpe Nsemo kaka lenda kwiza na nzila ya Ndinga ya Nzambi. Ndinga ya Nzambi kele Nsemo ntangu Yawu me monisama. Ya kele kaka Nkuna ya kulala awa, mutindu Nzambi kunaka bankuna nyonso.

32 Banzutu ya beto vwandaka na zulu ya ntoto ntete . . . mbote, mbote, ntete nsemo kuvwanda awa, luzingu nyonso awa, to kima mosi; calcium, potasse, pitiloyo, mpe nsemo ya yinza, nyonso yina, ya vwandaka awa—vwandaka awa ntangu Nzambi vangaka ntoto. Ya lombaka kaka Ndinga ya Yandi yina ba tubaka na kunata yawu na luzingu, kaka mutindu ya salaka

luzingu ya bayinti, to luzingu yinti, yina, to luzingu nyonso yina ya ke vwandaka.

³³ Kima ve lenda zinga, ya yinza to ya kimpeve, kukondwa Nsemo ya Yandi, mpe Ndinga ya Yandi kele Nsemo mpe Luzingu.

³⁴ Kasi ntangu Yandi ke fidisa Nsemo ya Yandi mpe ke sala ti Yawu kuzabana na bantu, mpe kuna ba ke losa Yawu, kuna wapi mutindu samu na yina? Ya kele yina beto zola kuzonzila na suka yayi, ya kele: na kumangaka Nsemo yayi, na nzila ya bawu ba fidisaka Yawu, ba mangaka kaka mutindu ya vwandaka kuna. “Beno tala kisadi ya Munu, na Yandi yina mu ke sepela.” Yandi kele Nsemo samu na Bantu ya makanda. Yandi kele Nsemo samu na yinza. Yandi vwandaka Nsemo ya yinza, kasi ba losaka Yandi. Yina kele kitini ya mawa.

³⁵ Mpe ya ke kukutanaka mutindu yina konso ntangu yina Nzambi ke monisa Nsemo ya Yandi, yinza yawu mosi ke manga nsemo yina. Samu na yinki? Ya kele kaka ya kusonika na kati ya Biblia. Konso nsungi, Nzambi me zenga mingi Ndinga ya Yandi samu na konso nsungi, mpe Yandi ke fidisaka ntangu nionso muntu samu na kumonisa Ndinga yina.

³⁶ Yesu pesaka profesi samu na bamvula mafunda yiya, ti Yandi ke kwiza, Mesiya. Mpe ntangu Yandi kwisaka, Yandi monisaka konso nsilulu ya Mesiya. Kasi dyaka bantu ya yinza, mabuundu, mpe nyonso yina, zabaka kima ve na yina me tala Yandi, na yawu, samu ti bawu kotaka na kima mosi yankaka yina bumbaka bawu ntama na kuzabaka Yayi. Ntangu yayi yinki kana muntu kaka . . .

³⁷ Beto ke baka kitini ya yinza. Yinki kana muntu, yina me butuka awa samu na kutambula na nsemo ya mwini yina, yina Nzambi me vangaka samu na yandi, mpe, kima ya ntete beno zaba, yandi ke kanga meso ya yandi, yandi ke kota na mbangu na yisi ya ntoto, ke kanga kielo, ke kulumuka na kivudi, mpe ke manga kaka na kuzaba mwini ke sema? Yandi ke manga bamuswa ya yawu. Yandi ke manga minzenzi ya yawu ya kitoko, yinto ya yawu ya luzingu. Yandi ke manga nsemo yina ke mwangana na yina yandi lenda mona kisika yandi ke kwenda, kisika yandi me katuka. Yandi ke manga yawu. Yinki beno lendaka tuba na bakala yina me kulumusa barido, to yina me kima mbangu na yisi ya ntoto mpe me kanga bansemo nionso, bisika nionso, mpe yandi me manga kaka na kundima ti mwini kusema? Ya kele na kima mosi ke tambula mbote ve na yintu ya muntu yina. Muntu nyonso zaba yawu. Dibanza ya kimuntu ke tuba na beno ti kima mosi ke tambula mbote ve na muntu yina, ti yandi kele, yandi kele—yandi kele . . . Kima mosi me salama na yandi. Yandi me zimbisa mabanza ya yandi.

³⁸ Mbote, ya ke mutindu yina na bangunga yayi beto ke na kuzinga, ntangu bakala mosi ke bumbama yandi mosi na mwa mutindu ya—ya esikize, samu na kuzaba kieleka Nsemo ya

Nsangu ya mbote mutindu Yawu ke lezima mutindu Yawu kele bubu yayi. Ntangu bakala mosi na luzolo nionso ke kwenda ntama ya Yawu mpe ke kota na kima mosi mpe ke kulumusa rido, yandi ke tuba, “Mu ke kwikila Yawu ve,” ya kele na kima mosi ke tambula mbote ve na muntu yina. Ya kele kaka ve na mutindu ya kubaluka na yawu. Ya kele na kima mosi ke tambula mbote ve. Kima mosi me salama na yandi. Mpe beto ke mona ti ya kele mingi, mingi ya yawu bubu yayi.

³⁹ Ntangu yayi, Yesu vwandaka bimbangi ya baprofete nyonso ya kutwadisama na kimpeve. Mpe profesi ya bawu nyonso kunatamaka na Nsemo na nsungi ya Yandi, yina pesamaka na profesi samu na nsungi ya Yandi. Yandi ke pelisa konso mwinda ya Ndinga yina vwandaka na kati ya Biblia, yina pesamaka na profesi ya Yandi. “Mwense mosi ke kuzwa kivumu.” Yandi kuzwaka yawu. Mbote mingi. “Ba ke bokila Yandi Konsense, Ntinu ya Ngemba, Nzambi ya Ngolo nionso, Tata ya Kukonda nsuka.” Yandi vwandaka. “Mpe meso ya bampofu ke mona.” Bawu salaka. Nyonso yina pesamaka na profesi ya Yandi, kusalamaka ntangu Yandi kwizaka na zulu ya ntotu.

⁴⁰ Mpe samu na yinki bantu lendaka ve kumona yawu, yina vwandaka. . . Ya ke monana ya ngitukulu samu na beto ntangu yayi, samu ti beto ke na kutalaka na manima na kitala-tala ya nene. Kasi beno me zaba yawu ntete ve, kana beno landila na kutala na manima mutindu yina, beno ke kuzwa kisumbula? Beto tala yina kele na ntwala samu na beto.

⁴¹ Yawu yina bawu vwandaka sala. Kikuma bawu salaka yawu, samu bawu vwandaka zinga na kivudi ya nsemo yankaka. Kuna vwandaka zinga na kivudi ya nsemo ya kilumbu yankaka yina.

⁴² Mpe ya kele yina mu ke kwikila kele dyambu na yinza bubu yayi, bankundi, ya kele samu ti beto ke na kumeka na kuzinga na kivudi ya nsemo yina lezimaka na kilumbu yankaka. Kivudi kele nsemo ya luvunu.

⁴³ Kaka mutindu kivudi ya maza na nzila. Beto ke kulumuka na nzila mpe ke mona kivudi ya maza. Ya kele dibanza ya luvunu ya mwini. Mpe ntangu beno ke kuma kuna, ya me basisa kima mosi ve kasi kima mosi ya luvunu. Samu, beno lenda ve kutambula na kivudi ya mwini, samu ti ya kele kivudi ya maza, ntangu nyonso na kulakisaka beno kima yina kele na kima ve.

⁴⁴ Mpe ntangu bantu ke meka na kutuba na beno ti Yesu Klisto kele ve mutindu mosi mazono, bubu yayi, mpe kukonda nsuka, ba ke na kutwadisaka beno na kati ya kivudi ya maza. Kaka yina. Mpe ntangu beno ke kota na dibuundu mpe ke kuma ya dibuundu, credo mosi ya madidi to kima mosi ya mutindu yina, ya kele ve na kima kuna, kulutila ve yina beno kuzwaka na yinza.

⁴⁵ Beno bika mu tuba na beno. Beno manga ve Nsemo ya Nsangu ya mbote ya Yesu Klisto, yina ke nata tiya na minzenzi

ya Mpeve-Santu na zulu ya beno, ke sala beno kivangu ya malu-malu kati na Klisto Yesu. Beno meka ve na kutambula na kivudi mosi ya nsemo ya nsungi yankaka. Ntangu yayi, kivudi yina zolaka vwanda mbote mingi na nsungi yankaka yina, ya zolaka vwanda mbote mingi samu na bawu.

⁴⁶ Ya me siamisama mutindu yina na kilumbu ya Mfumu ya beto Yesu. Yandi wandaka Nsemo ya Masonuku ya kilumbu yina. Yandi wandaka Nsemo. Yandi wandaka ve Nsemo tii Yandi kwizaka na zulu ya ntoto samu na kusiamisa Ndinga ya nsilulu. Beno zaba, Yandi tubaka kuna, “Jean wandaka nsemo yina wandaka ngenga mpe wandaka sema, mpe nge vwanda zola kutambula na nsemo ya yandi samu na nsungi mosi.”

⁴⁷ Kieleka, samu ti Jean pesaka profesi na nzila ya Ésaïe, bankama sambwadi mpe kumi na zole ya bamvula ntete mbutukulu ya yandi, ti, “Ndinga ya muntu mosi ke boka na ntoto ya kuyuma.” Mpe dyaka Malachie, ya nsuka ya baprofete, bankama yiya ya bamvula ntete nkwizulu ya yandi, na kapu ya 3 ya Mal- . . . ya Malachie, yandi tubaka, “Tala, Mu ke fidisa munati-nsangu ya Munu na ntwala ya kizizi ya Munu, samu na kuyidika nzila.”

⁴⁸ Awa wandaka Jean na zulu ya ntoto, na kusalaka ti Ndinga yina ba sonikaka kuzinga. Yandi wandaka ndinga ya muntu yina wandaka boka na ntoto ya kuyuma, mpe yandi wandaka dumuka . . . mpe wandaka yidika nzila na ntwala ya Mesiya. Mpe Yesu tubaka, “Benno ke zola kutambula na nsemo ya yandi, samu ti yandi wandaka nsemo yango, yina ke ngenga mpe ke sema.”

⁴⁹ Mpe Jean, yandi tubaka, “Ntangu yayi mu fwana kulumuka, nsemo ya munu fwana basika, samu (samu na yinki?) Mu me sadila ntangu ya munu yina pesamaka na profesi samu na munu. Benno kuwa Yandi! Yandi kele Yandi yina. Benno landa Yandi.” Ya wandaka zinga na kilumbu yina, ya wandaka talisa yayi.

⁵⁰ Ntangu yayi, ba-Juif banzaka ti bawu wandaka sambila na Nsemo ya kieleka. Bawu banzaka ti bawu wandaka sambila, Nzambi mosi yayi yina bawu wandaka manga. Yandi yina bawu banzaka ti bawu wandaka sambila, bawu wandaka koma na kulunsi. Bawu wandaka seka Nzambi ya kieleka, mpe wandaka sala Yandi kima ya kuseka na bantu, Nzambi yina bawu banzaka ti bawu wandaka sambila.

⁵¹ Bika mu tuba yayi na lukumu mpe buzitu, kasi kunata Nsemo, samu, mutindu mpangi ya beto ya bakala me tuba mwa ntangu fyoti me luta, beto ke na kuzinga ntama mingi kulutula nge banza ti beto kele. Mosi ya bilumbu yayi kima mosi ke salama, ntangu me luta mingi. Bantu ke baka kidimbu ya kibulu, na kuzabaka mpe ve yina bawu ke na kusalaka. “Mpofo ke twadisa mpofo, bawu nionso ke kubwa na dibulu,” Yesu tubaka. Mpe beto ke na kuzinga na ntwala kulutula beto ke banza. Bantu

mingi ya kusungama ke landa yawu, kukondwa kuzaba yina bawu ke na kusala.

⁵² Kasi ngunga me kuma pene-pene ntangu yayi ntangu Nsemo ke na kusema, Nsemo ya Nsangu ya mbote, na ngolo ya Yawu ya mvumbukulu ya Yesu Klisto, ke kukitalisa Yandi mosi ti Yesu Klisto kele mutindu mosi mazono, bubu yayi, mpe kukonda nsuka. Yandi yina zengaka samu na kilumbu yayi. Bima yina Yandi silaka samu na kilumbu yayi fwana salama na kilumbu yayi. Kana dibuundu ke ndima Yawu ve, Nzambi kele na kiyeka ya kubasisa na matadi yayi bana samu na Abraham. Yandi ke manisa Nsangu ya Yandi, samu ti Yandi ke salaka yawu ntangu nyonso. Yandi ke salaka yawu ntangu nyonso.

⁵³ Bantu vwandaka banza ti bawu ke tambula na kati ya Nsemo, binkulu ya batata, mpe, kima ya ntete beno zaba, bawu ke tambula na kivudi ya nsemo, Nsemo mosi ve, bawu mangaka Nsemo ya kieleka yina bawu ke tubaka ti bawu ke sambila.

⁵⁴ Bisalu ya Yandi me siamisaka pwelele Nani Yandi vwandaka. Yesu tubaka, Yandi mosi, “Beni longuka Masonuku, samu na Yawu beni ke banza ti beni kele na Luzingu ya Kukonda nsuka, mpe Yawu kele Yawu yina ke pesa kimbangi ya Munu. Nani lenda fundisa Munu na disumu?” Yandi tubaka, “Nani lenda lakisa ti mu me tuba kima mosi, to konso kima yina mu me sala, ti Tata ya Mazulu me siamisa yawu ve na nzila ya Munu?” Me talisa na beni ti Yandi vwandaka Nsemo ya ngunga, samu ti nyonso yina pesamaka na profesi ti Mesiya yayi zolaka vwanza mutindu yayi, mpe awa vwanza Luzingu vwanza me basika pwelele, kasi binkulu ya bawu kukabulaka bawu na Nsemo ya kieleka ya Ndinga.

⁵⁵ Ba-Pharisien, ba-Sadducéen, ba-Hérodien, mpe nionso yina ya lendaka vwanza, bawu kotisaka yinza na muvusu mingi, mutindu bawu salaka na bansungi nyonso, ti bawu zolaka mona ve Nsemo ya kieleka. Yawu tulaka meso ya bawu na ngaanda. Bawu vwanza tambula na kivudi, “Kilumbu yina ke landa ya ke vwanza yayi, mpe mbasi ya ke vwanza yayi. Beto ke kota na yayi, mpe ya ke vwanza yina. Beto ke kota na yina.” Beto ke mona ti ya kele mirage ya luvunu.

⁵⁶ Yesu Klisto kele kaka kieleka mutindu bubu yayi, na ntima ya muntu, mutindu Yandi vwanza ntete. Ngolo ya Yandi mpe Mvwandulu ya Yandi kele kaka kieleka mutindu bubu yayi mutindu ya vwanza ntete. “Tala, na mwa ntangu fyoti, mpe yinza ke mona dyaka Munu ve. Kosmos, ‘mutindu ya yinza,’ ke mona dyaka Munu ve. Kasi, beni ke mona Munu; samu Mu ke vwanza na beni, ata mpe na kati ya beni, tii na nsuka ya yinza. Bisalu yina Mu ke sala beni ke sala, ya kulutisa nene na yayi beni ke sala, samu Mu ke kwenda na Tata ya Munu.”

⁵⁷ Nsilulu yina ya nene kele bubu yayi. Yinza kele mpofo mutindu bawu lenda vwanza, kasi ya kele na “beni yina ke

mona Munu,” mpe ya kele yina beto ke na kumekaka na kuzwa bubu yayi. Yina Nsangu ya mbote ya muvimba, zola kutuba, kele kulakisa Yesu Klisto na ngolo ya mvumbukulu ya Yandi, mpe muvimba ya bansilulu ya Yandi; ti Mpeve-Santu ke monisa bima yayi mpe ke kumisa yawu mbote, ti Nzambi silaka, mpe Yandi ke sala yawu. Yinga, tata.

⁵⁸ Yandi vwandaka ya kusiamisama ya muvimba na Ndinga mpe na nzila ya bisalu yina Yandi vwandaka sala, kasi ata mosi ya bawu zolaka kukwikila yawu. Siamisaka ti Nsemo ya Yandi vwandaka Ndinga! Ndinga tubaka yawu, “Beno longuka Masonuku.”

⁵⁹ Kasi binkulu ya bawu kisika yina bawu vwandaka zinga, kivudi ya nsungi yankaka! Bawu tubaka, “Beto ke kwikilaka na Moise; Moise yina beto ke kwikilaka. Beto me zaba ve kisika Nge me katuka. Wapi kisika Nge me kuzwa ndongosolo ya Nge? Yinki Nge lenda lakisa ti Nge kele *Yayi?*”

⁶⁰ Bisalu ya Yandi pesaka kimbangi Nani Yandi vwandaka, kana bawu zolaka tanga kaka Biblia. Ba vwandaka tanga Yawu, kasi ba lendaka ve kumona Yawu. “Bisalu ya Munu ke talisa Munu.”

⁶¹ Muntu ke zabanaka na nzila ya ba-référence ya yandi, ba-référence ya Ndinga ya Nzambi, kana ba me tinda yandi na Ndinga ya Nzambi mpe na Ndinga ya Nzambi. Mutindu mosi na konso nsungi! Ya ke vwandaka ntangu nionso mutindu yina.

⁶² Beto lenda zinga ve na nzila ya nsemo ya mazono. Nsemo ya mazono kele disolo. Beto zaba kima ve na yina me tala yawu. Beno lenda ve kuzwa tiya bubu yayi na nzila ya mwini yina ke sema mazono. Ya kele yina kele dyambu na mabuundu bubu yayi. Yawu yina diambu na bantu, bawu ke meka na kuzinga na nzila ya yina salamaka mazono. Beno lenda ve tiya na nzila ya tiya ya foto. Kieleka ve, ya kele ve na tiya na kati ya yawu. Mwini ya mazono kele ve na tiya na kati ya yawu.

⁶³ Nsemo ya mwini me fidisama na ntoto, na yinza, samu na kuyelisa mbuma na ntwala ya kubuka bambuma. Konso kilumbu ke butaka mwini ya malu-malu. Mwini yina ke na kusema bubu yayi, na kunataka blé, na Canada; mwini mosi yina, mbote, kana ya vwandaka ve. . . vwandaka ve na mwini kulutila yina, nkwezulu yayi ya Ngonda ya sambwadi to ya Ngonda ya nana, ya zolaka ata mbala mosi ve kuyelisa mbuma. Ya fwana vwanda ngolo mingi mpe ngolo mingi, konso kilumbu ya ke kula mpe ke yela, samu na kunata mbuma.

⁶⁴ Ntangu yayi kana mbuma, yawu mosi, kana yawu banda na kuyela, mbuma ke basika, kana ya ke kangama kaka na mbuma, ya ke tunga kaka mbuma. Konso kilumbu, mpusu vwandaka ziunga yawu, ndambu ya calcium mpe nyonso yina vwandaka kota na yawu, ke tunga mbuma, mutindu mwini ke kuma ngolo mingi.

65 Kasi beno baka mwini yina ke sema na Ngonda ya nana, mpe beno tula yawu na zulu ya blé bubu yayi, ya ke kufwa yawu. Kieleka, beno lenda ve kusala yawu. Ya fwana kota na kati ya nsungi ya yawu. Na yawu ya fwana vwanda blé ya Nzambi mpe mbuma ke kula kaka na nsungi, nsungi Yawu kele na kati. Kasi wapi mutindu mwini . . . Mbote, blé ke kufwa, bambuma ke kufwa, na nzila ya mwini yina ke zinga bubu yayi, yina ke lezima bubu yayi, mu zola tuba. Bambuma ya yawu yina ke na kwiza ke na kuyela. Mbuma fwana kula na nsemo.

66 Kasi kima kele, bubu yayi, mbuma ya dibuundu ke zola ve kuyela. Ya ke zola kuvwanda mutindu ya vwandaka kuna na ntangu ya Moody, na Sankey, Finney, Knox, Calvin. Bawu vwandaka mbote mingi, bawu vwandaka nsemo ya ngunga.

67 Kasi yayi kele ngunga yankaka. Yayi kele kilumbu yankaka. Yayi kele ntomoso ya Nsangu ya mbote; Ya me kuma na kuyela ya yawu. Na yawu beto lenda zinga ve na yina Luther tubaka, Wesley tubaka, to ndambu yankaka ya bawu. Beto ke na kuzinga na kati ya Nsemo yina ba zabisaka na ntwala samu na kilumbu yayi. Beto kele na nsungi ya dibuundu ya sambwadi, ve nsungi ya dibuundu ya tatu to ya yiya. Mbuma fwana kuzwa Yawu. Kana ya kele ve mutindu yina, ya ke kubwa mpe Ya zola kutuba kima ve samu na yawu. Mbuma me yela na Nsemo kana yawu kwenda na ntwala na Nsemo.

68 Na yawu dibuundu zolaka nata dimpa ya konso nsungi, ti Yesu tumaka, ti, “Muntu ke zinga na konso Ndinga yina me basika na yinwa ya Nzambi.”

69 Dimpa yina beto kele na yawu nsatu kele na kati ya Biblia. Ya kele luzayikisu ya muvimba ya manaka ya Nzambi. Ya kele luzayikisu ya muvimba ya Yesu Klisto. Beto ke bwela kima ve na Yawu, to ke katula kima mosi na Yawu; muntu nyonso yina ke salaka, ba ke katula yandi na Buku ya Luzingu. Beto ke na nsatu ya ba-credo ve samu na kubwela na Yayi. Ya kele ya kusonika kaka mutindu Yawu zolaka vwanda. Beto ke bwela kima mosi ve na Yawu, ke katula kima mosi ve na Yawu, ke longa Yawu kaka mutindu Yawu kele, mpe Nzambi kele, ke monisa yawu. Konso nsilulu yina Yandi silaka, Yandi ke monisa yawu kaka mutindu mosi. Beto fwana ve kukatula na Yawu to kubwela na Yawu. Beno bika kaka Yawu mutindu Yawu kele.

70 Kasi, beno me mona, bubu yayi, beto ke mona bantu mutindu ya vwandaka fioti na kilumbu yina kuna, ke meka na kuzinga na kivudi ya nsemo. Dibundu fwana kuyelisa mutindu blé ke kula, “muntu yina ke zinga kaka na dimpa ve, kasi na konso Ndinga ya Nzambi, Dimpa ya Luzingu.” Kaka kitini ya Bandinga ve; konso Ndinga ya Nzambi, konso nsungi! Beno vwanda kaka ve mpe beno kudia madesu mpe bambala nionso. Ya kele na bima yankaka yina ke tambula na yawu, na yina beto ke landila kieleka ya Madia ya nene ya Nzambi yina me vwanda na ntwala

ya bantu ya Yandi, ngolo ya Mpeve-Santu, kyese ya Yawu, ya ngolo mpe Mpeve yina pesamaka. “Beno mpe ke sala bisalu yina Mu ke sala. Samu Mu ke zinga, beno mpe ke zinga.” Bansilulu yina Yesu salaka na Dibuundu ya Yandi, mpe kasi bubu yayi beto ke mona ti bantu ke meka na kuvutuka na nsungi yankaka yina me luta.

⁷¹ Nsungi ya Luther, ya vwandaka nsungi ya nene. Yandi monaka foti ya dibuundu ya Katolika, yandi monaka kominyo. Ti, ntwenya ya ngang-Nzambi yina, yandi monaka ti ya vwandaka luvunu, “ya vwandaka ve nzutu ya kieleka ya Klisto,” ya vwandaka kitini ya dimpa yina—yina ba sakumonaka. Mpe yandi monaka yawu, “vinu vwandaka ve Menga ya kieleka,” kasi ya vwandaka monikisa Menga. Na yawu yandi teleminaka kima yina samu ti ngunga ya ntangu yina vwandaka kuna. Mpe ata lutangu ya banganga-Nzambi vwandaka na bawu, mpe nyonso yina bawu vwandaka kuzwa, Nzambi simbaka muntu yina lendaka pelisa nsemo. Amen. Yandi ndimaka, “Kunungisama na nzila ya lukwikilu,” mpe yandi salaka nsemo ya nsungi ya Luther kusema. Na manima ya yina me kwiza, yina zingaka ntangu ya yandi ya kubasika.

⁷² Kuna me kwiza ntangu yankaka yina dibuundu zolaka basika na masumu ya yandi, mpe kuvwanda ya kusantisana. Kuna me kwiza John Wesley, mwa muntu ya Angleterre kuna, yina vwandaka ya dibuundu ya ba-Anglican, kasi yandi monaka nsemo na zulu ya Nsangu ya mbote. Ya vwandaka ngunga samu na Nsungi ya Philadelphie yina zolaka kwiza. Mpe ntangu yandi salaka yawu, yandi longaka bisalu ya zole ya lemvo, kusantisama na nzila ya Menga ya Yesu Klisto. Ya vwandaka ve na kima yina zolaka telama na nsemo ya yandi. Ba vwandaka tala yandi mutindu fanatiki kaka mutindu Luther vwandaka, kasi yandi teleminaka bayankaka nyonso ya bawu vwandaka, mpe pelisaka nsemo, samu ti ya vwandaka nsemo ya ngunga. Nzambi monaka muntu, John Wesley, yina lendaka pelisa mwinda.

Yandi talaka na . . . mpe dyaka Luther, yina balukaka na nsemo samu na nsungi yina.

⁷³ Na manima kwisaka bampangi ya ba-Pentecotiste. Ba vutukaka na nsungi ya bawu, ya kuvutuka ya makabu, kuvutula makabu, ya kuzonza na bandinga, makabu ya kubeluka, mpe bima na dibuundu. Ntangu yayi, bawu salaka kaka kieleka yina Masonuku tubaka ti bawu ke sala, mpe, ntangu bawu salaka yawu, bawu monisaka yawu. Ya kele kaka kieleka.

⁷⁴ Kasi beno me zaba ti beto me kwenda ntama na yawu? Beto kele na ntangu ya Kento ya makwela, ntangu ya kusoola, ntangu yina (Kento ya makwela) ba tubaka ti beto ke kuzwa. “Mangolo nyonso me bika,” tubaka Joël 2:28, “nyonso mangolo me bika, dikelele me kudyaa; mpe nyonso yina dikelele bikaka, dimpasu kudiaka.”

⁷⁵ Mosi na mosi ya ba-organisation yina, kana beno me tanga Bidimbu Sambwadi ya Biblia, mosi na mosi ya basungiki kwisaka mpe longaka Ndinga, kasi yandi bikaka kima mosi. Na manima yinki bawu salaka na manima ya basungiki, mpe nsemo bandaka na kubwa? Na kisika ya kukwenda na Nsemo ya ntuala, bawu bongisaka yawu. Mpe ntangu bawu kubongisaka yawu, “Beto ke kwikila Nsemo yayi. *Yayi kele* Nsemo! *Yayi kele* Yawu.” Yinki bawu salaka? Wesley kwisaka mpe kwendaka ntama na bawu.

⁷⁶ Yinki Wesley salaka? Yandi salaka organisation na manima ya yandi, mpe mpangi ya yandi—ya yandi, Jean mpe—mpe Charles, mpe kuna kwisaka Asbury mpe bayankaka, mpe, na manima ya bilumbu ya bawu, ba salaka organisation na yina ba vwandaka bokila dibuundu ya ba-Methodiste. Yinki bawu salaka? Bawu mangaka Nsemo ya kulutila ntama. Bawu tubaka kaka, “*Yayi kele* Nsemo. *Yayi kele* Yawu.”

⁷⁷ Na manima kwizaka ba-Pentecotiste mpe lakisaka bawu, ti Nzambi ke fidisaka dyaka mbotika ya Mpeve-Santu. Yandi ke kulumusa dyaka ngolo ya Yandi ya kubeluka, yina ba me manga. Yinki bawu salaka? Bawu kwendaka ntama na bawu, samu ti ya vwandaka nsemo yankaka.

⁷⁸ Yinki ya kele ntangu yayi? Beto me luta pene ya bamvula makumi sambanu, ba-Pentecotiste me bongisa organisation, “Beto kele *yayi*, beto kele *yina*,” mpe Nzambi me kwenda ntama na yawu; kuna na kati, mpe na kubutaka Kento ya makwela, Musolami, na nkonga yina. Na yina, ya ke vwanda ata mbala mosi ve na nsungi yankaka ya dibuundu. Nsungi ya Dibuundu ya Philadelphie vwandaka Wesley. Mpe Nsungi ya Dibuundu ya Laodicée kele organisation ya ba-Pentecotiste, yina ke kota mbala mosi na kidimbu ya kibulu. Ya kele Biblia, mutindu mpangi ya bakala yayi vwandaka tuba mwa ntangu fyoti me luta. Ya kele kieleka. Kieleka. Bawu kele, ba-organisation nyonso yina, samu ti bawu mangaka na kutambula na Nsemo ya ntuala. Bawu kubongisaka bawu mosi, mpe tubaka, “Beto ke kwikilaka yayi.” Ntangu Nzambi ke salaka kima, beno fyongonina yawu na Masonuku.

⁷⁹ Ba-Pharisien tubaka, “Beto kele na Yawu.” Ba-Sadducéen tubaka, “Beto kele na Yawu.” Kasi Nzambi vwandaka na Yawu! Nzambi me fungula mpe me lakisa Nsemo. Ba me losa Yawu mutindu Ya ke vwandaka ntangu nyonso.

⁸⁰ Dibuundu ya Katolika kumangaka Luther. Wesley kumangaka Luther. Mpe mutindu mosi dyaka bantu ya Pantekote kumangaka Wesley.

⁸¹ Mpe Mpeve-Santu bubu yayi ke na kumanga ba-Pentecotiste. Beno ke na kukuma kaka muntu ya misiku mpe madidi mutindu bayankaka ya bawu. Muntu nyonso lenda mona yawu. Mu zola beno. Beno kele pene-pene mingi na kima yina

kele na Biblia, mu zaba, ya kele samu na yina mu kele na beno. Kasi, beno kuwa, beno zibula meso ya beno mpe beno mona kilumbu yina beto ke na kuzinga! Ya kele ntangu ya fungula samu na kubaka diaka, mpe Nsemo ke kwisa, samu na kubasisa Yinti. Biblia ke tuba, na Malachie 4, “Yandi ke tinda mpe ke vutula diaka Lukwikilu ya kieleka yina vwandaka na bantu.” Yandi silaka yawu. Yandi ke salaka yawu ntangu nyonso. Yandi fidisaka Ndinga ya Yandi, mpe baprofete kwizaka samu ti Ndinga kwizaka na baprofete, mpe bawu vwandaka na Ndinga mpe salaka Yawu kuzinga.

⁸² Ba-organisation mpe ba-systeme ya ntangu mangaka yawu, nsungi nyonso, mutindu mosi bawu ke sala yawu bubu yayi. Nzambi kele kaka na kiyeka ya bubu yayi na kutelemisa muntu mosi ntangu yayi mutindu Yandi vwandaka na ntangu yina. Yandi basisaka ata fioti ve ba-organisation. Beno yufula konso muntu ya masolo, beno tala na kati ya masolo; ntangu organisation salaka organisation, yawu fwaka kuna mpe yawu vumbukaka ata fioti ve. Nzambi ke zonzaka na muntu mosi. Kieleka.

⁸³ Mpe Nzambi silaka na kusala dyaka yawu na bilumbu ya nsuka, mpe ti Yandi ke sala. Yina Nzambi silaka, ti Yandi ke sala, na kubaka Nsemo yina lenda siamisa Masonuku ya nsilulu ya bubu yayi. Yesu tubaka, “Mutindu ya vwandaka na bilumbu ya—ya Lot, mutindu mosi ya ke vwanda na nkwizulu ya Mwana ya muntu.” Beno ke lakisa, beno ke mona yina bawu ke na kusala. Beno tala Yehowa, yina Yandi me sala, Tata ya beto me tula nyonso na kisika.

⁸⁴ Ya kele na Lot kuna na yinza, kuna na Sodome, na disumu nyonso, tiya ve madidi ve. Ya kele na munati-nsangu kuna yina ke longa yandi, mpe.

⁸⁵ Ya kele na kimvuka ya Abraham, Musolami, basikaka, yandi yina na nsilulu, yina ke na kuingila kieleka Mwana. Lot vwandaka sosa mwana, mpe, kasi na mutindu ve ti Abraham vwandaka sosa yandi. Yinki salamaka? Kaka ntete ya salama, Nzambi kulumukaka mpe monisamaka Yandi mosi na nzutu, mpe tubaka ti Yandi vwandaka Ndinga, samu, “Ndinga ya Nzambi kele ya meno mingi kulutila mbele ya meno zole, mpe muswasikisi ya mabanza yina kele na kati ya ntima.” Yesu tubaka, “Ya ke vwanda mutindu yina diaka, na nkwizulu ya Mwana ya muntu.” Bansilulu yayi kele Kinzambi, ba zonzaka na nzila ya bikoba ya Yesu Klisto. Nyonso zole mazulu mpe ntoto ke kubwa, kasi Yawu ke kubwa ata fioti ve. Nzambi kele dyaka na kiyeka ya kubasisa na matadi bana samu na Abraham. Oh, yinga!

⁸⁶ Beto kele na nzila ya beto, kima mosi mutindu Israel vwandaka. Israel, na nzyetolo ya bawu, zolaka kuzwa mani ya malu-malu konso kilumbu, samu ti mani ya malu-malu

kubwaka. Beto zolaka zinga ve na nsemo ya Luther, kuzinga na nsemo ya—ya Wesley, to kuzinga na nsemo ya Pentecote. Beto kele na nsungi yankaka, Mana ya malu-malu.

⁸⁷ Yinki salamaka kana bawu mekaka na kubumba mani yina kuna? Ya bebaka. Ya zolaka kufwa bawu. Ya kele samu na yina beto kele na Baklisto mingi ya kufwa ya kimpeve, bayina ba ke bokilaka Baklisto. Ba ke na kudia kivudi ya nsemo ya kilumbu yankaka. Ba ke na kudia mana yina me beba yimeni. Kaka mutindu mpusu na zulu ya blé, kana ya kota ve na blé, ya ke basika na blé. Mpe ntangu ba ke losa Nsemo, ya kele ve na kima mosi ya kusala, ba ke soba na mpimpa. Konso kitini ya mpimpa, ke manga na kumona Nsemo, ke vutuka na mpimpa. Mutindu mosi ya ke salaka yawu na Nsangu ya mbote, na konso nsungi ba me talisa ti ya kele kieleka. Beto ke na kuzinga na ntangu yina.

⁸⁸ Mani ya Mazono me beba. Mu kuwaka bantu kutuba, “Bamvula makumi yiya me luta, mu salaka *yayi-mpe-yayi*.” Ya kele kieleka, kasi wapi mutindu samu na bubu yayi? Wapi mutindu samu na dibuundu na tiya? Beto ke zonzila mazono, wapi mutindu samu na dibuundu bubu yayi? Wapi mutindu samu na beno mutindu muntu mosi bubu yayi? Samu, mazono ke sala ve samu na bubu yayi. Ya vwandaka mbote mingi mazono.

⁸⁹ Nsangu ya Luther vwandaka nsemo ya ngunga, mutindu vwandaka ya Jean, kasi kuna me lezima nsemo ya kulutula nene. Mutindu mosi vwandaka Luther nsemo ya nene, mpe beto sepelaka na yandi samu na nsungi mosi, kasi kuna kwizaka nsemo yankaka yina kangaka yinwa ya yandi. Yinki ya zolaka vukana na Yawu; mpe Yawu kwendaka na kisika ya kulunga ya Dimpa, bawu kwendaka na Mana ya Nzambi ya kulunga. Kasi yinki bawu salaka? Bawu salaka organisation. Muntu kotaka na yawu. Na kisika ya Nzambi kutwadisa yawu, muntu mpe basysiteme ya yandi kukotaka na kati ya yawu, kufwaka yawu meso.

⁹⁰ Oh, Yinti ya Kento ya makwela yayi bubu yayi, ba me zenga yawu. Konso divala yina ke butaka ve mbuma kele ya kukabuka. Yesu tubaka yawu, Santu Jean 15. Yinki me salama ntangu yayi, beto ke mona ti ba zengaka bawu, ba zengaka bawu.

⁹¹ Beno bambuka moyo, ntima ya kieleka ya yinti kele kaka na kati-kati ya yinti. Mbuma ke yelisa ntangu nyonso, kisika ya nsuka yinti ke buta mbuma, ya kele kaka na zulu ya yawu, samu ti ya kele madidi yina ke katukaka na kati-kati ya luzingu yina kele na kati ya nkuna.

⁹² Ya kele Yinti ya Kento ya makwela. Yesu vwandaka Kento ya makwela, Yandi vwandaka Yinti. Ba zengaka Yandi. Yandi vwandaka Yinti ya Luzingu yina vwandaka na nsaba ya Eden. Ba zengaka Yandi mpe komaka Yandi na yinti ya Rome, samu na kuseka Yandi. Yinki Yandi salaka? Nzambi vumbulaka Yandi na lufwa kilumbu ya tatu, na lufwa. Mpe bubu yayi ya kele na Yinti

ya Kento ya makwela; Ya bandaka ntama kuna na mbandukulu, kuna na Kilumbu ya Pentecote.

⁹³ Beno kuwa, beno bantu yina kele ya dibuundu! Dibuundu kubandaka ata mbala mosi ve na Nicée, na Rome. Ya bandaka na Jérusalem, na Kilumbu ya Pentecote, bandaka Dibuundu. Na manima yinki bawu salaka? Bawu landilaka kaka na kusala organisation; mpe Nzambi landilaka na kuzenga mavala. Na manima bawu bongisaka ba-Luthérien; zengaka mavala. Wesley; zengaka mavala. Pentecote; katulaka mavala. Tii ya ke kwisa. . .

⁹⁴ Kasi Nzambi ke kuzwa Yinti ya Kento ya makwela! “Nyonso yina mankonko kudiaka mpe mangolo kudiaka, mu ke vutula yawu,” me tuba Mfumu. Malachie 4 ke tuba na beto ti ba ke vutula beto na Lukwikilu ya kieleka mutindu ya vwandaka na Kilumbu ya Pentecote, “Lukwikilu ya batata.” Beto ke kwikila ti ya ke kwiza. Mu ke kwikila ti ya kele ntangu samu na yawu ntangu yayi. Mavala me kawuka mpe me kawuka ngolo, mpe ba ke katula bawu na Yinti, samu ti mbuma kubuta yawu mosi kaka na zulu ya Yinti. Oh, la la!

⁹⁵ Bansemo nyonso yayi kele mbote mingi. Dibuundu bubu yayi kele nsemo yango na kubwela yina yawu me kuzwa bubu yayi. Ya kele samu na kumanisa kuyonzika. Na yina beto ke tala, ti Yinti yawu mosi, to. . . Blé fwana kula na Nsemo, ke basika kubanda na mwinga tii na nkuna, mpe kubanda na nkuna ya ke landila. Ya ke yela na Nsemo. Nsemo ya bansungi yankaka pesaka kaka kimbangi ya nsungi yayi. Nsemo ya Luther pesaka kimbangi ya—ya nsemo ya Wesley. Wesley kuzwaka nsemo ya Pentecote. Ya kele nsemo mosi, yina me kula kaka na nzila ya Nsemo. Kana bantu lendaka kaka kumona yawu!

⁹⁶ Mwa ntangu fioti me luta, mu vwandaka tanga mwa mukanda mosi ya fioti, kisika ntinu-kento ya Angleterre, (ntinu-kento yayi ve) ntinu-kento yankaka, yandi kwendaka kutala kompani ya ba-papié yina vwandaka sala ba-papié ya kitoko. Mpe ntangu ba yufulaka yandi na nzila ya ntwadisi ya yinsi ya kompani yina, yandi bakaka yandi kuna. Yandi vwandaka zola kumona mutindu mukanda yango ya mbote salamaka. Yandi bakaka yandi mpe lakisaka yandi bamasini nyonso ya nene ya mikanda mpe nyonso. Mpe na bilumbu yina, ba salaka ba-papié ya bitende. Beto ke bambuka moyo na yawu. Na yawu yandi kotaka na kivinga mosi mpe zibulaka kielo, mpe ya vwandaka ve na kima mosi kasi kinkuku ya ba-chiffon. Ntinu ya kento, na kuyituka, tubaka, “Yinki kele bima yayi ya mvindu?”

⁹⁷ Muntu yina. . . mfumu ya kompani, tubaka, “Yina vwandaka bilele, mazono. Beno me mona, ya me kuma mvindu. Beto ke losa yawu ve, kasi ya kele mukanda ya mbasi.”

Yandi tubaka, “Mu ke bakula yayi ve.”

Yandi tubaka, “Nge ke bakula yawu mbasi.”

⁹⁸ Na yina ntangu ba ke kotisa ba-chiffon yayi na kati ya masini ya mikanda, na kati ya kisalu mosi ya kusukula, mpe—mpe kima mosi yina ya zolaka lutila, na nsadulu mosi; ntangu ya basikaka, ya vwandaka ba-papié ya kitoko mingi. Mfumu ya yinsi banzaka ti yandi ke talisa na ntinu-kento kima yina yandi me zaba ve. Yandi tulaka foto ya yandi na zulu ya yawu, mpe zengaka yawu na zulunale yayi ya kitoko. Ntangu ntinu-kento kuzwaka yawu, yandi monaka mfumu ya mbanza ya yandi mosi yina vwandaka bitende ya mvindu, mazono, samu ti ya lutilaka na nzila ya nsadulu mosi.

⁹⁹ Oh, kana Luther, Wesley, mpe bawu nyonso, zolaka mona yawu, kima ya mazono yina ba lenda sadila kaka mutindu ya ke luta na nsadulu mosi! Ntangu Mpeve-Santu ke monisa Nsemo, katuka kunungisama na kusantisama, tii na mbotika ya Mpeve-Santu, mpe ntangu yayi ngunga ya nsuka ya Nkwizulu ya Klisto; ya kele na kati ya ntela ya yawu ya mbote, ve ya ntinu-kento, kasi ya Ntinu ya Mazulu yina ke kukitalisa Yandi mosi, mutindu dibuundu me kuma fioti mingi, mutindu ministele fwana vwanda mutindu mosi ya ministele yina Yandi kuzwaka.

¹⁰⁰ Bayina kufwaka na nsungi ya Luther, kuna na yisi ya pyramide, mutindu; ve malongi ya pyramide, kasi kaka samu na mbandu mosi.

¹⁰¹ Pyramide yina kele ya kulunga mingi, kana mosi ya beno zolaka vwanda kuna. Beno lendaka ve kulutisa lutebo, na mpasi. Ba—ba vwandaka ve na potopototo na kati ya yawu, landila mutindu beto zaba. Ntungulu ya yawu vwandaka nene mingi! Ntangu yayi, ba me zimbisa ditadi ya yintu. Ba me zaba ve kisika ya kele. Ntangu yayi ntangu ditadi yina ya yintu ke vutuka, ya ke vwanda kaka mutindu kitini yankaka ya yawu, ya ke vukana na ditadi yina me bikana ya kuzibuka. Kana beno fwana tula ditadi ya yintu na zulu ya yawu, ya fwana vwanda mutindu yina.

¹⁰² Mpe ntangu Yesu ke vutuka, Yandi ke tala Dibuundu yina ba me sukula, kukondwa ditona to mifutu, mpe ya ke vwanda mutindu mosi ya ministele Yandi kuzwaka. Ya ke vutula Ditadi ya yintu.

¹⁰³ Mutindu diboko ya munu awa, na kivudi. Ya kele kivudi, kaka ya kele mpimpa mingi mutindu diboko ya munu ke kuma mingi. . . Ya kele negatif *awa*, positif *awa*. Mpe mutindu negatif na positif, kivudi ke kumaka ya kukangama mingi; mpimpa mingi, mpimpa mingi, mpimpa mingi, mpe na nsuka ya me kangama kintwadi, mpe negatif mpe positif me kuma mosi.

¹⁰⁴ Ya kele ntangu Dibuundu mpe Klisto ke vukana kintwadi, mutindu Kento ya makwela, na Mpeve mosi yina vwandaka na kati ya Yandi ke vwanda na zulu ya Yandi; ntangu Dibuundu yina me katuka na kunungisama, kusantisama, mbotika ya Mpeve-Santu, na bilumbu ya nsuka, mpe ya ke vedisa yawu ntangu yayi samu na Nkwizulu ya Mfumu.

105 Oh, beno vwanda ve kitini ya ngolo na zulu ya Yawu, mpangi-bakala ya Pentecote. Beno sema na Ndinga mpe beno kwikila Yawu nionso. Beno basika ve na ba-isme yayi mpe nyonso yina, na yina beto ke mona kusalama bubu yayi. Beno vwanda ve ya kuyituka na yawu, samu ti Ditadi ya yintu ke na kwiza, ke na kudila, “Abba, Tata,” ntama mingi ve, “Nzambi ya Munu! Nzambi ya Munu!” Yinga, mu ke kwikila yawu na ntima ya munu ya muvimba.

106 Beno me mona yawu? Beno zaba yina mu zola kutuba? Ya kele Klisto ntangu yayi yina ke na kubakaka ba-chiffon ya mazono, ba-Luthérien, ba-Methodiste, ba-Presbyterien, mpe nyonso yina, mpe Yandi ke na kutulaka yawu na kati ya nsadulu mosi. Wapi mutindu ya nsadulu? Masini ya Mpeve-Santu; yina bawu kuzwaka, ba ke bwela; na kusalaka yawu ti Yandi ke na kufinaka kifwanisu ya Yandi Mosi, ntangu Dibuundu mpe Klisto ke kuma mosi na kimvuka. Nzambi, pesa yawu! Mu ke na kivuvu ti beno ke mona yawu. Kana beno me mona yawu . . .

107 Ya ke bambula munu moyo na disolo mosi, ti ntangu réveil ya nene ya Galles vwandaka landila. Bantu ya nene awa na yinsi banzaka ti bawu ke kwenda kuna mpe ke tala reveil ya Galles, yinki ke na salama. Mpe na yina bawu kwendaka kuna, samu na kutala, samu bawu mona wapi yinzo ya vwandaka salama. Ntangu bawu kumaka na yinsi ya Galles, bawu kwendaka balukaka na nziunga, bawu bandaka na kuyufula kisika reveil vwandaka. Bawu monaka mwa kisadi mosi ya soda ya kiese ya kutelama kuna na nsongi, na mwa yimpu ya yandi ya kisadi na lweka, mpe vwandaka ningisa matraque ya yandi na lweka awa mpe kuna mutindu yina. Mpe na yina babakala yayi kwisaka pene-pene ya yandi, mpe tubaka, “Tata, nge lendaka tuba na munu wapi kivinga yina reveil ya yinsi ya Galles ke na salama?”

108 Yandi tubaka, “Yinga, tata, mu kele yawu! Mu kele yawu!” Samu na yinki? Yandi vwandaka mwangisa kiese mpe Nsemo ya yinsi ya Galles—Galles yina vwandaka na kati ya yandi.

109 Mutindu mosi dibuundu ya Pantekote bubu yayi, vwandaka yufula, “Nani kele Yesu Klisto, mutindu mosi mazono, bubu yayi, mpe kukonda nsuka?” Nsemo ya Yandi ya Nsangu ya mbote ya Yandi fwana sema na Ndinga ya nsungi yayi, na kumonisaka Yesu Klisto na yinsi, kaka mutindu ya vwandaka kuna.

110 Yandi vwandaka ya kufuluka mingi na reveil ya Galles tii yandi kumaka reveil ya yinsi ya Galles.

111 Beto fwana vwanda ya kufuluka mingi na Klisto tii beto—beto ke lakisa Yandi na ngolo ya Ndinga ya Yandi yina me pesama na beto na kilumbu yayi. Bampangi, beno vwanda ve ya kudinda na kati ya bima ya yinza, ve, bakyadi yayi ke na kubenda beno. Beno bikana na Nsangu ya mbote. Beno tala mbote konso Ndinga! Beno vutuka ve na yina tata mosi tubaka. Beto kwenda kaka na yina Yesu tubaka zolaka salama na

kilumbu yayi. Yinga, tata. Beto fwana vwanda Nsemo ya nsungi yayi, na kumonisaka Nsangu ya mbote. Luther vwandaka nsemo ya yandi. Wesley na nsemo ya yandi, Pentecote vwandaka nsemo ya yandi. Kasi, beto kele ntama mingi na nzila ntangu yayi, beto ke kota na Kento ya makwela, yina ba ke bokila na kubasika, Musolami. Beno bambuka moyo, kana beno kele, beno kele kaka mutindu kisadi yina, yandi vwandaka na Yawu na kati ya yandi.

¹¹² Beno bambuka moyo, yayi kele nsungi ya dibuundu ya sambwadi, Nsungi ya Dibuundu ya Laodicée. Landila Apocalypse 3, bawu mangaka Klisto. Ya konso nsungi ya dibuundu yina vwandaka ya kutuba na Biblia, Nsungi ya Laodicée vwandaka ya kulutila yimbi na bawu nyonso. Yawu basisaka Yandi, mangaka Yandi, tulaka Yandi na ngaanda.

¹¹³ Beno me mona ngonda ndombi, nkokila yankaka yina, ntete pape kukwenda na Rome, katuka Rome na Jérusalem? Jérusalem, dibuundu ya kulutila ntama; ngonda kele kifwanikusu ya dibuundu, ntangu nyonso na kulakisaka nsemo ya mwini, na ntangu mwini vwandaka ve, mpe yawu vwandaka ndombi. Mu fikulaka yawu na tablo awa, bamvula tatu to yiya me luta, mpe lakisaka mabuundu, na bankama mpe mafunda ya bayinzo na yinsi ya muvimba. Yinki ya vwandaka? Kivudi. Mbala ya ntete pape mosi katukaka, samu na kuvutuka awa, yandi kwisaka na—na nkumbu ya Paul, mpe nionso yina, ya lutaka na bisika yina; ya zolaka sakumuna nzadi, samu na kuzabuka yawu, mpe nionso yina. Yinki nzadi ke na nsatu ya lusakumunu?

¹¹⁴ Yinki kele dyambu na nsungi ya dibuundu yayi yina beto ke na kuzingila bubu yayi? Beno lenda mona yawu ve? Nzambi ke zabisa yawu na mazulu, ke zabisa yawu na Ndinga ya Yandi, ke zabisa yawu na zulu ya mukanda, ke zabisa Yawu na kati ya bantu? Beno lenda zibula ve meso ya beno mpe kumona ngunga? Yayi kele yawu yina ke pesa kimbangi ya Kieleka. Yayi kele Nsemo ya ngunga.

¹¹⁵ Beno tala mouvement ya nene ya oecumenisme, ya ke na kwenda na kati ya concil yayi ntangu yayi, ke na kusalaka kaka kifwani ya kibulu, na Apocalypse 17, kieleka yawu yina ya ke tuba ti ya ke sala. Beno ba-Pentecotiste ke vwanda swi samu na yawu mpe ke kota na kati ya yawu? Ngunga ya kupusa me belama.

¹¹⁶ Ntangu yayi kele ntangu ya kutelama mpe kupelisa mwinda ya beno, mpe kupesa nsemo na Nsangu ya mbote ya Yesu Klisto mpe Ngolo.

¹¹⁷ Mu zaba ti yayi kele ve ya kuzabana, ntangu bankundi ya munu mingi ya Pantekote vwandaka na pape mpe nyonso, mpe kutuba, “Nsatu ya kimpeve mingi.” Samu na munu, ya kele—ya kele luvunu. Ya kele ya kuswaswana na Biblia. Ti Ndinga ya Nzambi kuvwanda Kieleka. Yinga, tata. Ya kele ntangu ntangu

yayi. Beto ke mona ba-mouvement yayi ya nene kusalama na . . . Oh, ya ke monana mbote na disu ya kimuntu, ya kieleka.

¹¹⁸ Caïphe talaka mbote na yina yandi vwandaka talisa na banganga-Nzambi, na kilumbu yina, kilumbu yina nionso. Kasi Yesu vwandaka Nsemo yina vwandaka sala ti Ndinga kuzinga, kasi bimvuka ya bawu mpe nionso yina kufwaka meso ya bawu na Yawu. Yandi tubaka, “Beno bika bawu; bampofu ke twadisa bampofu, bawu nyonso ke kubwa na dibulu.”

¹¹⁹ Beto ke vutuka diaka na ntangu yina, bampangi-babakala mpe bampangi-bakento. Beto ke vutuka diaka na ngunga yina. Beno tala. Samu na yinki? Diambu ya mutindu mosi.

¹²⁰ Beto ke mona ti bansemo ya nene yina beto zingaka, na bilumbu yina lutaka, ya vwandaka mbote mingi, beto ke telemina bawu ve. Kasi, Nsungu ya Dibundu ya Laodicée yayi, beno sala keba, beno bambuka moyo, ya kele Klisto yina ba me losa. Mpe ya kele kieleka yina yawu kele ntangu yayi.

¹²¹ Mouvement yayi ya nene me tambula, samu na kuvukisa ba-Protestant nionso kintwadi, mouvement oecuménique yayi. Mpe yinki ya ke na kusala? Ya ke na kunata mpimpa na Ndinga ya kieleka, yawu mosi, mpe Ndinga kele Klisto. Wapi mutindu bawu lenda sala? Na yina, Science Chrétienne, mpe Bampangi ya Kuvukana, mpe mingi ya bantu yina na ba-organisation yankaka ya nene, bayankaka ke kwikilaka mbutukulu ya bumwense, bayankaka ve, bayankaka ke kwikilaka *yayi* mpe *yina*. Wapi mutindu beno lenda vukana beno mosi na kukondwa lukwikilu? “Wapi mutindu bantu zole lenda kutambula kintwadi kana ti bawu kuwisana ve?” Beno basika na kati-kati ya bawu mpe beno kabwana, mpe beno baka Ndinga ya Nzambi ya Santu mpe beno kangama na Yawu.

¹²² Yesu Klisto me tumama na ngolo na kutalisa Ndinga ya Yandi. Kima yina beto kele na yawu nsatu bubu yayi kele kutelama ya Malachie 4. Profete yankaka ke telema na Nkumbu ya Mfumu Yesu Klisto, mpe ke sala kieleka yina Yandi silaka na kusala. Na yina, bantu ya kufwa meso ke bika Yawu mpe ke tambula kaka na kati ya mpimpa, mutindu bawu ke salaka ntangu nyonso.

¹²³ Beno tala mbote ntangu yayi, beto ke tala, dyambu mosi, ti bubu yayi, ti bawu mangaka, mabuundu ke manga Nsangu, ke koma Ndinga na kulunsi, ke basisa Ndinga. Ntangu yayi kana beno kele ve ya yawu, beno lenda mpe ve—beno lenda ve kuzwa dibuundu ya beno. Ba ke kanga yawu nyonso. Beno fwana kota na kati ya yawu. Kana beno sala yawu ve, beno ke kangama. Na yina wapi mutindu samu na yawu? Oh, beno telama samu na Yina kele kieleka! Beno bambuka moyo, ya kele dyaka ntangu ya kukoma na kulunsi, na kutala.

¹²⁴ Nsemo ya luvunu me nata kuyiba ya kulutila—ya kulutila nene yina yinza me kuzwaka ntete ve, na Angleterre, ntama

mingi ve. Kuyiba ya kulutila nene yina me salamaka ntete ve, kusalamaka na nzila ya nsemo ya luvunu. Kuyiba ya mafuku sambwadi ya ba-dollar kusalamaka na nzila ya nsemo ya luvunu yina kangaka tomabilu yina, mpe Scotland Yards lendaka ve kuzwa bantu yina. Bawu kwendaka ntama na yawu, na mayele nionso. Yina zabanaka mutindu kuyiba ya kulutila nene yina salamaka ntete ve na nzila ya miyibi, na yinza. Ya yibaka yinza, kuyiba ya yandi ya kulutila nene.

¹²⁵ Mpe kuyiba ya kulutila nene yina me salamaka ntete ve na dibuundu ya Yesu Klisto, me salama na nzila ya nsemo ya luvunu, kivudi ya nsemo mosi ya nsungi yankaka, mpe kumanga Nsemo yina ba zabisaka na ntwala samu na nsungi yayi. Amen. Nsemo ya luvunu, kivudi ya mazono! Beno tambula ve na kivudi ya mazono. Beno tambula na tiya ya Mwana bubu yayi. Beno kwenda ve na kivudi ya denomination, na kutubaka, “Bilumbu ya bimangu me luta.”

¹²⁶ Yesu tubaka, “Bidimbu yayi ke landa bayina ke kwikila: na Nkumbu ya Munu ba ke basisa bampeve ya yimbi, ba ke tuba bandinga ya malu-malu. Bidimbu yayi ke landa bawu.”

¹²⁷ Bawu ke tuba, “Ya kele nyonso ya kulunga samu na bantumwa; ve samu na beto.” Ya kele kivudi.

¹²⁸ Yesu tubaka, “Bidimbu yayi ke landa bayina ke kwikila, na yinza ya muvimba.” Yinga, tata.

¹²⁹ Ntangu yayi yinki kele dyambu? Na kutambulaka na kati ya kivudi, ya me sala kuyiba ya kulutila nene, ya me katula Klisto na dibuundu. Beno me mona, wapi mutindu Klisto lendaka monisama Yandi mosi na kati ya Ndinga yina ba silaka bubu yayi, na nzila ya credo mosi ya madidi ya mazono? Ya ke pesa tiya ve na Nkuna. Ve, tata. Kuyiba ya kulutila nene ya dibuundu!

¹³⁰ Tiya? Mpe, beno bambuka moyo, ti nsemo ya credo ya madidi ke yelisa ve Nkuna ya bubu yayi. Ya ke manga Nkuna. Ya kele lubungi yina kele na zulu ya ntoto, kieleka. Ya kele ntangu samu na Nzambi na kuvumbuka mpe kubalula dyaka Nsemo, kusala Ndinga ya Yandi kuzinga. Kieleka, Nsemo! Credo yango ya madidi ke yelisa ve Mbuma. Kieleka ya ke vwanda ve.

Mpe, beno bambuka moyo, civilisation me sala nzietelo na mwini.

¹³¹ Mutindu mu tubaka na beno na mbandukulu, mu fwana tala mbote bingana, mutindu yinza ke tambulaka. Mu kele ve na ndongosolo ya kusala yawu; mu zola yawu ve. Mu ke zola mingi kuzwa yina mu me kuzwa, kulutila malongi nyonso na yinza. Mu kele na Yesu Klisto. Mu ke mona Yandi kuzinga Ndinga ya Yandi tii na nsuka, mpe yawu yina kaka mu ke na yawu nsatu ya kuzaba.

¹³² Mpe kana muntu me butuka na Mpeve ya Nzambi, yandi ke sosa Masonuku samu na kumona kana Yawu kele mvutu

samu na bubu yayi. Mvutu ya kilumbu keke Klisto. Klisto keke Ndinga. Ntangu Ndinga ke kwiza na luzingu, ya ke lakisa Nsemo yina ba silaka samu na bubu yayi. Na Nsungu yayi ya mudidi ya Laodicée, kaka na mwa ndambu, “Bayina nionso mu ke kuzwaka, mu ke sembaka bawu, mu ke sungikaka bawu. Balula ntima,” Yesu tubaka, “mpe vutuka.” Beno vutuka na Ndinga. Yandi keke Ndinga. Beno kwiza na Yandi. Yinga, tata.

¹³³ Beno tala mbote Nsemo. Ya katukaka na Esete, na kukwendaka wesete. Beto keke na Côte Ouest. Ya vwandaka na bitezo tatu, mutindu yina ve? Ya vwandaka na bitezo tatu. Ya zabukaka masa, bambala tatu. Kubanda na Paul, mpe yawu zabukaka na Méditerrané, ya kwisaka na Allemagne, Allemagne lezimaka na Luther; yawu zabukaka Kanale ya Angleterre, kuna ya kwendaka na Etats-Unis mpe ntangu yayi. . . .kuna ya kwendaka na—na Angleterre; na manima, na Angleterre, Yawu zabukaka na Pacifique, samu na kukwenda na Etats-Unis. Mpe yandi salaka nzila ya yandi kuna na nsangu ya Luther, ya landilaka kuna, tii na kitini ya nsuka ya Yawu keke awa na Côte Ouest dyaka.

¹³⁴ Mpe kubanda na kuyela ya mbuma, kubanda ntama na Luther, nzila nyonso tii na nsungi, ya fwana vwanda muvimba ya Nsangu ya mbote ntangu yayi, Ngolo ya Nzambi samu na kuyelisa. Nsemo yina ba me lakisa na nzila ya kunungisama, kusantisama, nsungi ya pentecote, fwana kuyelisa Yinti ya Kento ya makwela samu na Nkwizulu ya Mfumu Yesu Klisto; ti Klisto lendaka monisama na kati ya Dibuundu ya Yandi, mutindu Muntu mosi, Yandi mpe Kento ya Yandi, Yandi mpe Kento ya Yandi ya makwela. Amen. Yayi keke ngunga yina beto ke na kuzinga. Yayi keke Nsemo ya kilumbu. Beno tambula na kati ya Yawu! “Beno kuzwa mpulusu, nsuka nyonso ya ntoto.”

¹³⁵ Kivudi ya dibuundu ya kilumbu yayi vwandaka na luvunu mingi, Yesu tubaka na Matthieu 24. Yandi tubaka, “Ya ke vuna bantu ya kieleka ya kusolama kana ya lendaka salama.” Beno me mona, ve Luther zolaka ve kuzwa. . . Luther zolaka vuna ve ba-Méthodiste. Ba-Méthodiste zolaka vuna ve bantu ya Pantekote. Ya keke kieleka, beno me mona, kasi wapi mutindu samu na Kento ya makwela? Ya keke yina ke basisaka meso ya ba-Pentecotiste. Yinga. Beno me mona, beno me vutuka na credo ya beno, na mutindu ya beno, ya kubongisa, mpe me kuzwa nkonga ya bantu na kutubaka na beno yinki ya kusala.

¹³⁶ Biblia ke silaka bima yayi. Beto keke na nsatu ya babakala mpe bakento yina me fuluka na Mpeve ya Nzambi.

¹³⁷ Kana beno tuba ti beno keke na Mpeve ya Nzambi na kati ya beno, mpe Nzambi ke salaka nsilulu mosi na kati Awa, wapi mutindu Mpeve-Santu yina lendaka ndima Yawu, na kutubaka, “Mbote, ya lendaka vwanda mbote mingi samu na nsungi

yankaka. Beto ke kwikilaka Yawu ve mutindu yina”? Yina kele ve Mpeve-Santu.

¹³⁸ Muntu yina kele ya kifuluka na Nzambi, yandi mpe Ndinga kele mosi. Kieleka, ya kele. Ya kele mbuma ya kuvukana, kuvukana na kati-kati ya Nzambi mpe muntu.

¹³⁹ Wapi mutindu kento, yina ke vwanda bakala ya bakala mosi, kuvwanda ya kuswaswana, kusala bima yina yandi zolaka ve ti yandi sala? Wapi mutindu beto lenda tambula na yinza, mpe ba-dénomination mpe ba-organisation, mpe kumanga Nsemo ya ngunga? Wapi mutindu ya lenda salama, mpangi-bakala mpe mpangi-kento? Na zola ya kinzambi mpe buzitu samu na mosi na mosi ya beno, wapi mutindu beto lenda ndima bima yayi? Wapi mutindu beto lenda kuwa yawu? Ya ke vutuka diaka na makulu ya beto.

¹⁴⁰ Beno fundisa ve ba-Luthérien; samu, ba fundisaka Catholique. Beno fundisa Wesley ve; samu, yandi fundisaka ba-Luthérien. Beno me mona, mutindu yina, ntangu beno ke fundisa Kima yina ke na kusalamaka bubu yayi mpe ke baluka na Yawu; ntangu beno ke mona mabuundu ya beno kukota na mouvement oecuménique yayi ya nene, mpe nyonso ya mutindu yina, na kutwadisaka beno, muntu nyonso, na kidimbu ya kibulu, mpe beno me kuzwa yawu. Bantu mingi ya ntima ya kusungama ke kota mbala mosi na kati ya yawu.

Beno ke tuba, “Bawu kele bantu ya mbote, bantu ya santu.”

¹⁴¹ Mutindu mosi vwandaka banganga-Nzambi yango. Kana mu zolaka baka busantu ya Yesu Klisto, to bambuma ya Mpeve, mingi na kati ya beno kwendaka na zulu ya yayi. . . Ntangu yayi, kukondwa buzitu na yawu. Mu ke kwikila konso Ndinga ya yawu.

¹⁴² Mingi ke tuba, “Oh, mu zonzaka na bandinga. Mu kele na Yawu.” Ya kele Yawu ve. Ve, tata.

Mingi ya bawu ke tuba, “Mbuma ya Mpeve, ya kele Yawu.” Ya kele Yawu?

¹⁴³ Beto tula Yesu na lufundusu (Nzambi, lemvočila munu) mwa ntangu fyoti. Beto nata beno, mpe mu ke vwanda nganga-Nzambi. Mu ke tuba na beno, “Ntwenya ya Bakala yayi, yina me kwiza na mbanza, yina ba ke bokila Yesu ya Nazareth. Beno kuwa Yandi ve. Beto ke kwikilaka na mbuma ya Mpeve. Ntangu yayi beno tala awa, kiboba ya nganga-Nzambi ya beno. Yandi, nkooko ya yandi ya bakala, nkooko ya nkooko ya yandi, nyonso vwandaka banganga-Nzambi. Yandi pesaka munkayulu, luzingu ya yandi nyonso ya ntwenya. Yandi vwandaka kaka na seminere. Yandi vwandaka tala, yandi kwikilaka, yandi—yandi salaka nyonso yina bawu longaka yandi. Yandi zaba Masonuku, kubanda A tii Z. Yandi sonikaka Yawu, yandi mosi. Yandi sonikaka Masonuku, yandi mosi, misoniki ke salaka yawu. Mpe yandi yayi awa, bakala mosi ya nene! Beno zaba ti yandi kele.

144 “Yinki salamaka ntangu mama ya nge vwandaka kubuta nge? Nani telemaka pene-pene ya mbeto ya nge? Nganga-Nzambi ya kiboba ya mutindu yina. Ntangu mama mpe papa zolaka kukabwana, nani tulaka maboko ya bawu na zulu ya bawu zole mpe twadisaka bawu na Nzambi? Kiboba ya nganga-Nzambi yina. Yinga.

145 “Mpe Yehowa ke lomba mwana-dimeme samu na munkayulu, samu na disumu. Bantu ya mumbongo, bawu ke zingaka na bambanza awa mpe bawu—bawu ke tekaka bima ya bawu, mpe—mpe nionso yina, bambuma ya bawu mpe ke basisa, mpe nyonso yina bawu ke teka. Bawu ke vumbula ve bana ya mameme. Mpe yinki banganga-Nzambi salaka? Yandi salaka mwa kutelama kuna, samu na bawu na kutekisa bana ya mameme, samu ti muntu yayi kukota, kukumisa moyo ya yandi na Yehowa.

146 “Yinki muntu yayi, Yesu ya Nazareth, salaka? Wapi dibuundu Yandi katukaka? Wapi denomination Yandi kele? Wapi kalati ya kimpangi? Beto ke losa Yandi na ngaanda. Beto ke vwanda ve na kima ya kusala na Yandi, samu Yandi ke fundisa beto nionso. Yinki Yandi salaka? Yandi kwendaka kuna mpe bakaka yawu, kisika bantu ke na kumeka na kuzwa mpulusu ya myoyo ya bawu, dibuundu,” mutindu beto ke bokila yawu bubu yayi, beno bantu ya dibanza ya kimpeve, “Yandi bulaka na zulu ya mesa, panzaka mbongo; bakaka fimbu mpe tungaka yawu kintwadi, mpe basisaka bawu na ngaanda; mpe bokilaka kiboba ya nganga-nzambi ya beno ya santu, ‘mwana ya dyabulu,’ kiboba ya bakala yina defisaka beno mbongo yina ntangu beno vwandaka na mpasi.

147 “Nani ke telama pene-pene ya beno mpe ke zika beno ntangu beno kele ya kufwa? Kiboba ya nganga-Nzambi yina ya lutondo. Yandi kele na mbuma ya Mpeve. Kasi Yesu yayi ya Nazareth kele na mbuma ya Mpeve?”

148 Beno lenda ve kufundisa na kuzonzaka na bandinga, to dyaka beno lenda kusambisa na nzila ya mbuma ya Kimpeve. Kasi ya kele kumonisama ya Ndinga ya Nzambi, yina nataka na Nsemo. Ya kele Nsemo yina ke salaka yawu.

Muntu yina ke tambula na kati ya Nsemo yina! Yesu Klisto vwandaka ve na zulu ya kuzonza na bandinga, ata ti Yandi salaka yawu. Yandi vwandaka ve mbuma ya Mpeve, ata ti Yandi salaka yawu. Beno lendaka ve kusambisa yawu. Kasi Yandi kwikilaka mpe ndimaka Yawu, mpe Nzambi zingaka konso Ndinga ya nsilulu ya kilumbu yina na nzila ya Yandi. Ya kele Nsemo ya ngunga. Ya kele nzikisa.

149 Ntangu muntu mosi ke tuba na munu ti Mpeve-Santu ke kulumuka na kati ya bawu ke manga Ndinga ya Nzambi na kuvwandaka mutindu yina, ya kele na kima mosi ke tambula mbote ve na yawu. Ya kele na kima mosi ke tambula mbote

ve na baseminere ya beto, mpe nyonso yina, ntangu bawu ke longaka muntu nyonso yayi awa théologie ya kubongisa mpe bima ya bubu yayi. Bantu yina zolaka sala mutindu mosi na kuteleminaka Ndinga ya Nzambi, mpe ke twadisa bawu mbala mosi na kati ya abattoir yina ya oeucuménisme kuna, na yina, ya kieleka, ya kele luvunu.

¹⁵⁰ Mu ke zonga yawu na Nkumbu ya Mfumu! Beno tala mbote mpe beno mona kana Yawu kele ve kieleka, Nsemo, Nsemo ya ngunga!

¹⁵¹ Ba-credo yina ya madidi lenda ata fioti ve kunata kuyonzika. Beto fwana kuzwa Dibuundu yina ba me sukula na Menga ya Mwana-dimeme, mpe kukuma mosi na Ndinga, kuvwanda Dibuundu.

¹⁵² Bivudi ya Dibuundu ya kilumbu yayi, Yesu tubaka, kele na luvunu mingi, “na kutala bantu ya Kusolama kana ya lendaka salama.” Kaka Musolami! “Kasi mutindu ya vwandaka na bilumbu ya Noé, ntangu myoyo nana vulukaka, mutindu mosi ya ke vwanda na Nkwizulu ya Mwana ya muntu.” Ya kieleka, kaka bantu fyoti ke kuzwa mpulusu na ntangu yina.

¹⁵³ Yinki ya ke sala? Ya ke twadisa kaka na abattoir. Beto ke mona ti na kati ya mpimpa yayi yina beto ke na kuzinga. Mu ke sukisa, na kutubaka yayi. Na kati ya mpimpa yayi yina beto ke na kuzinga, bilumbu yayi beto ke na kuzinga ntangu yayi, ntangu Nsemo me basika na mazulu, ba me basisa Yawu awa na kati-kati, ntete, samu na kutalisa beto; yina vwandaka talisa na nzila ya Biblia, na zulu ya Bidimbu Sambwadi, yina vwandaka salama. Mpe awa Nzambi ke tuba yawu kaka na mazulu, ke kulumuka mpe ke tuba yawu na zulu ya ntoto. Mpe mabuundu ke na kutambula na kati ya yawu!

¹⁵⁴ Nani ke vulusa mwa Kento ya makwela yina ke kebaka Ndinga? Yinki ke salama na Yandi ntangu ba ke losa Yandi na ngaanda ya madidi, Yandi mosi? Yandi ke vwanda ve madidi, Ndinga ya kusiamisa ya nsilulu kilumbu yayi. Oh, yinga. Ya kele mutindu . . .

¹⁵⁵ Ya kele na ngaanda ya nzila, mu zaba ti ya kele, samu na bantu, na kumona dibuundu kutuba kaka, “Mbote, ya kele kaka mutindu mosi.” Yesu tubaka ti ya ke vwanda mutindu yina. Ya ke vwanda, tii, “Ya ke vuna Basolami kana ya lendaka salama.” Oh, yinga. Yinga, tata.

¹⁵⁶ Mu ke bambuka moyo na muntu mosi na Floride, ntama mingi ve. Yandi vwandaka tuba, yandi tubaka ti yandi vwandaka na ditoma ya Chevrolet yina bebaka kuna na Floride, mpe yandi tubaka ti yandi nataka yawu na garage. Mpe kisadi-matoma yayi yidikaka yawu, mpe yandi vukisaka nyonso kintwadi, mpe yandi lendaka ve kupelisa yawu. Yandi tulaka mayele ya yandi nyonso kuna na kati ya yawu, yina yandi lendaka. Yandi vutulaka ya malu-malu bima nyonso yayi ya kuswaswana, kasi, samu na

kima mosi to yankaka, ya vwandaka pela kaka ve. Mpe yandi lendaka ve kupelisa yawu. Yandi landilaka kaka na kumeka mpe mekaka. Mwa kisadi-matoma yina vwandaka na kidi-kidi, vwandaka kima bisika nyonso, bisika nyonso na kivinga, yandi vwandaka lokota bima.

¹⁵⁷ Mpe bakala yina vwandaka ya kutelama, yandi tubaka, “Mu ke na kuingila ditoma ya munu, tata. Mu me kuma na nsukinina. Nge lenda ve kupelisa yawu?”

¹⁵⁸ Yandi tubaka, “Mu ke na kusalaka nyonso mu lenda sala,” yandi vwandaka kieleka na kidi-kidi mpe ya kudasuka. Mpe yandi landilaka na kutambula.

¹⁵⁹ Na mbala mosi bakala mosi ya kulwata mbote me belama mpe me tala yandi mwa ntangu fyoti, mpe yandi tubaka na kisadi-matoma, na manima yandi bikaka yandi kubula yintu ya yandi bisika nyonso na mwa ntangu fioti, yandi tubaka, “Samu na yinki nge ke simba yayi ve? Nge ke na lutisa ve courant.”

¹⁶⁰ Na yina yandi tubaka, “Mu me banzaka yawu ata fioti ve.” Na yina yandi balulaka mwa kima yina yankaka, ata ti ya vwandaka nyonso yina, mpe yandi kuzwaka courant, ditoma pelaka.

¹⁶¹ Yandi balukaka mpe tubaka, “Nani nge kele?” Beno zaba nani yandi vwandaka? Mfumu ingénieur ya—ya General Motors. Yandi salaka kima yango. Yandi salaka yawu.

¹⁶² Na ngunga yayi, mpangi-bakala, ntangu beto ke kukiyufula yinki kele diambu na reveil ya beto, yinki kele diambu? Beto kele na kima mpe nyonso, beto kele na mekaniki, kasi wapi kisika kele Dynamique? Yawu yina beto ke na yawu nsatu, samu na kunata Yesu Klisto na kisalu. Yinki kele diambu? Mu ke tuba na beno, ti Mosi kele awa bubu yayi, alleluia, yina ba me bokila Mpeve-Santu, yina lenda simba Dynamique. Yandi kele Dynamique ya mekaniki.

¹⁶³ Beto me telama bubu yayi, beto ba-Pentecotiste, mosi ya mabuundu ya kulutila nene na yinsi, mafunda ya kukangama na konso mvula, kasi wapi kisika kele Mpeve-Santu yango? Beto me ndima yawu, na kuzonzaka na bandinga, mpe beto me mona mutindu ya kele ya kusala. Ba-Méthodiste me ndima yawu, na kubokaka. Luther kundimaka yawu, na lukwikilu, mpe nyonso ya mutindu yina. Ya kele Yawu ve.

¹⁶⁴ Ya kele Ndinga! Ya kele Ndinga yina me baluka, Nsemo ke baluka na mekaniki mpe bawu me kuma Dynamique. Ba kele Dynamique, ntangu Dynamique, ntangu Dynamique ke kwisa na mekaniki. Ya ke banda na kubaluka. Ya kele kieleka. Beno baka Ndinga. Kana ya kele na mwa kima mosi me kondwa, na zulu ya Yawu, ya ke pela ve. Beno katula kizitu nyonso, ba-isme nyonso, ba-credo nyonso, ti Dynamique, Mpeve-Santu, lendaka mwangana na nzila ya Ndinga mpe kusiamisa Ndinga yina ba silaka samu na kilumbu yayi; na yina Dibundu ya nene ya

Nzambi ke mata na zulu mutindu mpepo ya réaction, ya ke kwenda na mazulu samu na kukutana na Mfumu ya yandi. Ya kele kaka kieleka. Tii beto ke sala yawu, ya ke simba ve. Ya kele yina me tala. Yinga, tata. Nani ke sala yawu? Nani ke bumba yawu na kilumbu yayi yina beto ke na kubanza? Beno bambuka moyo, beno bambuka moyo, mpangi ya bakala.

¹⁶⁵ Ntangu yayi ya ke bambula munu moyo na mwa disolo yankaka. Mu vwandaka vutuka ve na masolo, kasi nkundi ya munu vwandaka ya kutelama na Carlsbad, na New Mexico, ntangu beto vwandaka kuna na lukutakanu mosi na Carlsbad. Mpe ya vwandaka na nkonga ya bantu yina kwendaka kuna na caverne yayi.

¹⁶⁶ Oh, mu—mu me salaka ntete ve mutindu kima yina, kuna kisika ya kele mudindu, mpe pene ya ba-kilometre nana na kati ya ntoto. Munu, mu ke sepela awa. Na yawu, bawu kulumukaka na yisi mingi. Mu zola kumata na zulu, kukulumuka ve. Na yawu mu . . .

¹⁶⁷ Bawu bakaka muntu yayi, bawu kulumukaka kuna. Mpe yandi vwandaka nkundi ya bakala, mpe mwana ya yandi ya kento ya ntwenya mpe mwana ya yandi ya bakala kwendaka kuna na bawu. Mpe—mpe bawu kulumukaka kuna na kati ya ntoto ya nene, oh, mu banza, bankama mpe bankama mpe bankama ya bametele na yisi ya ntoto, bawu kulumukaka kuna. Mpe bakala yina kuna na buto, na mbala mosi [Mpangi Branham me fina misapi ya yandi—Mu.] yandi kangaka buto. Mpe ya vwandaka ndombe mingi mpe mudidi, ti beno lendaka mona ve diboko ya beno na ntwala ya kizizi ya beno. Mwana-kento mosi ya ntwenia, mwa kima mosi ya fioti, vwandaka na boma mingi. Yandi bandaka na kuboka na ndinga ya ngolo, “Oh, ya kele mpimpa! Ya kele mpimpa! Ya kele mpimpa,” na kubokaka ngolo.

¹⁶⁸ Yandi salamaka ti mpangi ya yandi ya bakala ya ntwenia vwandaka ya kutelema kuna. Yandi bokaka na kati ya mpimpa, yandi tubaka, “Kubanga ve, mpangi-kento ya ntwenia, kele na muntu mosi awa yina lenda pelisa mwinda.”

¹⁶⁹ Alleluia! Yinki Dibuundu ya fioti ke sala? Beno vwanda na boma ve. Ya kele na Muntu awa bubu yayi yina lenda pelisa Nsemo, ya kele Mfumu Yesu Klisto. Oh, yinga. Mfumu Yesu Klisto!

¹⁷⁰ Beno bambuka moyo, bampoyo . . . bantu ya bimvwama na bilumbu ya mbutukulu ya Yesu, bawu vwandaka ve ya kutula na ngaanda mpe kufwaka meso na kivudi ya Jérusalem ntangu bawu kumaka kuna, na kulomba Yandi. Théologie ya bawu—ya bawu lendaka ve kutendula yawu. Kasi ntangu bawu balukaka, bawu landaka Yawu na Nsemo ya Luzingu ya Kukonda nsuka.

¹⁷¹ Beno bantu ya mumbongo bubu yayi, beno tala ve bivudi ya ba-organisation yayi, kasi beno kangama na Ndinga. Ya ke twadisa beno na Nsemo. Beno vwanda na boma ve, mpangi-

kento ya leke, ya ke na Muntu mosi awa yina lenda pelisa Minda. Ya kele na Klisto awa Yina lenda sala ti Ndinga ya Yandi kuzinga kaka mutindu Yandi vwandaka na ntangu yina, ke siamisa Yandi mosi ti Yandi kele mutindu mosi mazono, bubu yayi, mpe kukonda nsuka. Beno me kwikila yawu?

Beto telama.

¹⁷² Mu kele na baminuti kumi na tanu ntete ntangu kukwenda na lukutakanu yina ke landa. Beno zola kutelemisa maboko ya beno mpe kutuba, “Nzambi, pelisa mwinda na zulu ya munu, na suka yayi. Mu ke kwikila Ndinga. Mu ke kwikila mekaniki. Tula Dynamique na kati ya munu, Mfumu”? Beno telemisa maboko ya beno mpe beno boka na Yandi, “Mfumu, pelisa Minda!” Ya kele na Muntu awa yina lenda pelisa Minda. Beto kele ya kufwa, na kati ya communisme, mpe beto kele ya kudiana na mankonko ya mitindu nionso ya ba-organisation, kasi ya kele na Muntu awa Yina lenda pelisa Minda. Muntu yina kele Mpeve-Santu, Yandi mosi, Yesu Klisto me monisama na kati ya Mpeve!

¹⁷³ Mfumu Yesu, simba mosi na mosi ya maboko yayi; kaka ve maboko, kasi kulumuka na yisi ya diboko tii na ntima, mpe beno losa Nsemo ya Nsangu ya mbote na zulu ya yawu. Na Nkumbu ya Yesu!



BENO PELISA NSEMO KNG64-0125

(Turn On The Light)

Nsangu yayi ya Mpangi William Marrion Branham, kulongamaka na Kingelesi, na Kilumbu ya sambanu na suka, na kilumbu ya 25 ya Ngonda ya ntete, na mvula 1964, na madia ya suka ya Lukutakanu ya Yinza ya muvimba ya Bantu ya mumbongo ya Nsangu ya mbote ya Muvimba na Ramada Inn na Phoenix, Arizona, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org